


SANCTISSIMI D. N. D. CLEMENTIS DIVINA PROVIDENTIA PAPÆ XII. JUBILÆUM UNIVERSALE

Ad implorandam Divinam opem pro pace inter Principes Christianos, & aliis Catholicæ Ecclesiæ necessitatibus.



CLEMENTIS PAPÆ XII.

Universis Christi Fidelibus presentes literas inspecturis salutem, & Apostolicam Benedictionem.



Ecclesiæ Militantis Regimini, nullo licet meritorum nostrorum suffragio, divinâ providentiâ præsentibus, acerbissimo sanè, ac penè inexplicabili paterni cordis nostri mærore angimur, dum mentis nostræ aciem longè, latèque circumferentes attentè contemplamur quantis Christiana Respublica, luctuosis hæc temporibus, ferè undique jactetur calamitatum fluctibus, & procellis, cumque potissimum intuemur dirum, atroxque bellum inter Principes Catholicos non ita pridem exortum, ac vehementius in dies recrudescens florentissimas Orbis Christiani Provincias, ac potentissima olim Regna cædibus, ruinis, excidiis, & vastationibus complere, ac miserè depascere: Et quamvis de Dominici gregis Salute, ac publica tranquillitate solliciti, nihil eorum, quæ Officii nostri ratio à Nobis postulat, humanaque monet prudentia, prætermittamus, ut tot, tantique malis, & ærumnis remedium queramus, ac præsertim quidquid in Nobis est virium, & consilii in id conferre non cessemus, quò eorundem Catholicorum Principum animi sublatis gliscientibus dissidiis ad mutuam concordiam revocentur, ac in pristina charitatis compagem restituantur; quia tamen vani sunt hominum conatus, nisi gratiæ cælestis ope adjuventur, manus, & oculos cum lacrymis, & gemitu ad eum assidue attollimus, qui altissimum posuit refugium suum, quique concludit ossibus Mare, & ei dicit usque huc venies, & non procedes amplius, & hic confringes tumentes fluctus tuos, ut ipse pro sua clementia, in qua præcipue confidimus, motas sedet, ac imminentes repellat tempestates, sævientique belli, & alia Divinæ Sæe ultionis flagella à Christi fidelibus procul avertat. Quamobrem vos omnes, quibus curam, & sollicitudinem nostram impendimus, ad id ipsum conjunctis nobiscum precibus à Deo totius consolationis humiliter efflagitandum excitandos duximus, Fugientes igitur à facie arcus adeamus cum fiducia ad thronum gratiæ, ac scissis per veram penitentiam cordibus nostris cælestem iram, quam iniquitates nostræ provocaverunt, obsecrationibus, jejunii, elemosynis, aliisque piis operibus placare studeamus, ut qui castigat nos propter scelera nostra, salvet nos propter misericordiam suam, & quam mundus dare non potest, populo suo supplicanti pacem benignè largiatur. Hæc autem, ut ferventiori spiritus ardore, uberiorique fructu fiant, ex præfata Romanæ Ecclesiæ omnium Matris, & magistræ more, Cælestium munerum thesaurus, quorum dispensationem fidei nostræ commisit Divina Dignatio, aperire, & largam manu erogare decrevimus. Itaque de Omnipotentis Dei misericordia, ac Beatorum Petri, & Pauli Apostolorum ejus auctoritate confisi, ex illa ligandi, atque solvendi potestate, quam Nobis Dominus contulit, Universis, & Singulis utriusque Sexus Christi fidelibus in Alma Urbe nostra degentibus, qui Sancti Joannis in Laterano, Principis Apostolorum, & Sanctæ Mariæ Majoris de eadem Urbe Ecclesias, seu Basilicas, vel earum aliquam intra decursum proximæ, quæ erit Secunda Adventus, vel immediatè subsequenti hebdomadæ usque ad Dominicam sequentem inclusivè, saltem semel devotè visitaverint, ibique per aliquod temporis spatium pias ad Deum preces, ut supra, effuderint, ac Quarta, & Sexta Feriis, & sabbatho alterius ex præfatis hebdomadis jejunaverint, & peccata sua confessi, Sanctissimum Eucharistiæ Sacramentum in Dominica die immediatè sequenti, vel aliâ die intra eandem hebdomadam reverenter sumperint, ac pauperibus aliquam elemosynam, prout unicuique suggeret devotio, erogaverint; cæteris verò extrâ Urbem prædictam ubicumque degentibus, qui Ecclesias ab Ordinariis Locorum, vel eorum Vicariis, seu Officialibus, aut de eorum mandato, & ipsis deficientibus, per eos, qui ibi curam animarum exercent, postquam ad eorum notitiam hæc nostræ pervenerint, designandas, vel Ecclesiarum hujusmodi aliquam spatio duarum similiter hebdomadarum à publicatione designationis per Ordinarios, vel eorum Vicarios, seu Officialis, vel alios, ut præfertur, faciendæ decurribarum saltem semel visitaverint, ibique ut supra oraverint, ac quartâ, & sextâ Feriis, ac Sabbato alterius ex hebdomadis hujusmodi jejunaverint, pariterque peccata sua confessi, ac in die Dominicâ immediatè sequenti, vel aliâ die intra eandem hebdomadam Sanctissimâ Communione refecti fuerint, & pauperibus aliquam elemosynam, ut præmittitur, erogaverint, plenissimam omnium peccatorum suorum indulgentiam, & remissionem, sicut in anno Jubilei visitantibus certas Ecclesias intra, & extrâ Urbem prædictam concedi consuevit, tenore præsentium concedimus, & elargimur. Navigantes verò, & iter agentes, ut cum primum ad sua sese domicilia receperint, supra scriptis peractis, & visitatâ Ecclesiâ Cathedrali, vel majori, aut Parochiali loci eorum domicilii, eandem indulgentiam consequi possint, & valeant: Regularibus autem personis utriusque sexus, etiam in claustris perpetuò degentibus, necnon aliis quibuscumque tam Laicis, quam Ecclesiasticis secularibus, vel regularibus, etiam in carcere, aut captivitate existentibus,

bus, vel aliquâ corporis infirmitate, seu alio quocumque impedimento detentis, qui suprà expressâ, vel eorum aliqua præstare nequiverint, ut illa Confessarius ex jam approbatis à locorum Ordinariis ante præsentium publicationem, seu approbandis, eis in alia pietatis opera commutare, vel in aliud proximum tempus prorogare possit, eaque injungere, quæ ipsi penitentes efficere poterunt, pariter concedimus, & indulgemus. Insuper omnibus, & singulis Christi fidelibus utriusque sexus tam Laicis, quam Ecclesiasticis secularibus, & regularibus cujusvis Ordinis, Congregationis, & Instituti, tam in Urbe præfata, quam extra eam ubique locorum, ut præfertur, degentibus licentiam concedimus, & facultatem, ut sibi ad hunc effectum eligere possint quemcumque Presbyterum Confessarium tam secularem, quam cujusvis Ordinis, & Instituti regularem ex approbatis, ut præmittitur, à locorum Ordinariis, qui eos ab excommunicationis, suspensionis, & aliis Ecclesiasticis sententiis, & censuris à jure, vel ab homine quâvis causâ latâ, seu inflictiis, necnon ab omnibus peccatis, excessibus, criminibus & delictis, quantumvis gravibus, & enormibus, etiam locorum Ordinariis, five Nobis, & Sedi Apostolicæ, etiam in literis die Cæne Domini legi solitis contentis, & alias per quascumque nostras, aut Romanorum Pontificum Prædecessorum nostrorum Constitutiones, quarum tenores præsentibus haberi volumus pro expressis, quomodocumque reservatis, in foro conscientiæ, & hac vice tantum absolvere, & liberare valeant, & insuper vota quæcumque (religionis, & castitatis exceptis) in alia pia, & salutaria opera commutare, injunctâ tamen eis, & eorum cuilibet in supradictis omnibus casibus penitentia salutari, aliisque ejusdem Confessarii arbitrio injungendis. Quapropter tenore præsentium in virtute sanctæ obedientiæ districte præcipimus, atque mandamus omnibus, & quibuscumque Venerabilibus Fratribus, Patriarchis, Archiepiscopis, Episcopis, & aliis Ecclesiarum Prælati, ac quibuscumque Ordinariis locorum ubicumque existentibus, eorumque Vicariis, & Officialibus, vel iis deficientibus, illis qui curam animarum exercent, non tamen qui per dictos Prædecessores à S. Romanæ Ecclesiæ communione quomodolibet separati fuerint, ut cum præsentium literarum transumpta, aut exempla, etiam impressa acceperint, illa statim absque ullâ morâ, retardatione, vel impedimento per suas Ecclesias, & Dioceses, Provincias, Civitates, Oppida, Terras, & Loca publicent, & publicari faciant, Ecclesiæque, seu Ecclesias visitandas designent. Non intendimus autem per præsentem super aliquâ irregularitate publica, vel occulta, nota, defectu, incapacitate, seu inhabilitate quoquo modo contractâ dispensare, vel aliquam facultatem tribuere dispensandi, seu habilitandi, & in pristinum statum restituendi, etiam in foro conscientiæ; neque pariter easdem præsentem iis, qui etiam eorum nomine speciatim non expresso à communione Sanctæ Romanæ Ecclesiæ, ut præfertur, segregati, seu à Nobis, & Apostolica Sede, vel ab aliquo Prælato, vel Judice Ecclesiastico excommunicati, suspensi, interdicti, seu alias in sententiis, & censuris incidisse declarati, vel publicè denunciati fuerint, nisi intra tempus dictarum duarum hebdomadarum satisfecerint, aut cum partibus concordaverint, ullo modo suffragari posse, aut debere. Non obstantibus Constitutionibus, & Ordinationibus Apostolicis, præsertim quibus facultas absolviendi in certis tunc expressis casibus itâ Romano Pontifici pro tempore existentibus reservatur, ut nec etiam similes, vel dissimiles Indulgentiarum ad instar, ac quoruncumque Ordinum, & Congregationum, five Institutuum regularium, etiam juramento, confirmatione Apostolica, vel quâvis firmitate aliâ roboratis statutis, & consuetudinibus: privilegiis quoque, indultis, & literis Apostolicis eisdem Ordinibus, Congregationibus, & Institutis, illorumque personis quomodolibet concessis, approbatis, & innovatis. Quibus omnibus, & singulis, etiam si de illis, eorumque totis tenoribus specificis, expressis, & individuis, non autem per clausulas generales idem importantes, mentio, seu quævis alia expressio habenda, aut aliqua alia exquisita forma ad hoc servanda foret, illorum tenores præsentibus pro sufficienter expressis, ac formam in eis traditam pro servatâ habentes, hac vice specialiter, nominatim, & expresse ad effectum præmissorum derogamus, cæterisque contrariis quibuscumque. Ut autem præsentem nostram, quæ ad singula loca deferri non possunt, ad omnium notitiam facilius deveniant, itaque, ut earundem præsentium transumptis, vel exemplis, etiam impressis, manu alicujus Notarii publici subscriptis, & sigillo personæ in dignitate Ecclesiastica constitutæ munitis ubique locorum, & gentium eadem prout fides habeatur, quæ haberetur ipsis præsentibus, si forent exhibitæ, vel ostensæ. Datum Romæ apud Sanctam Mariam Majorem sub Annulo Piscatoris die iij. Decembris MDCXXXIV. Pontificatus nostri Anno quinto.

F. Card. Oliverius.

Anno à Nativitate Domini Nostri JESU CHRISTI millesimo septingentesimo trigesimo quarto, Indictione duodecima, die verò quarta Decembris Pontificatus Sanctissimi in CHRISTO Patris, & Domini Nostri Domini CLEMENTIS Divina Providentia PAPÆ XII. anno quinto, supradictæ Literæ Apostolicæ affixæ, & publicatæ fuerunt ad valvas Basilicarum Lateranensis, Vaticanæ, & Libertianæ, Cancellariæ Apostolicæ, Montis Cimatorii, Aciei Campi Floræ, ac aliis locis solitis, & consuetis Urbis per me Petrum Rigbi Apostolicum Cursum.

Franciscus Bartolottus Magister Cursum.